



Siverth K. Heilmann

UKA 2022/30-78-89

Atassut

13. Oktober 2022

Imm. 30

Meeqqat ADHD-mik aamma autisme-mik nappaateqartut siusinnerusukkut paasineqartarnissaannut qanoq pitsanngorsaasoqarsinnaaneranut pilersaarummik Naalakkersuisut suliaqaqqullugit peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortaq Mikivsuk Thomassen, Inuit Ataqatigiit)

Siullermik siunnersuuteqartoq inatsisartuni ilaasortaq Mikivsuk Thomassen, Inuit Ataqatigiit qulaani qulequtarineqartumut siunnersuuteqarninnut qujanaq, imatullu naatsumik Atassummiit oqaaseqarfignissavarput.

Iluoorpoq ADHD-mik Autismimillu meeqqat inunnguutsiminnik pigisaqartut Nunatsinneersunit amerliartuinnarneri, taamaattumillu sapinngisaq tamaat piaarnerusumik misissorneqartarnissaannut paasilertorneqartarnissaanullu inatsisartut aqqutigalugit aqqutissiuuseqataasariaqartugut.

Ikiugasuarnissamik siunertaqaraanni, tunngavilersuutigineqartumi susassaartut tamarmik peqataanissaat avaqqunneqarsinnaanngilaq, inoqarfiillu soorunami tamarmik matumani pingaartinneqarnissaat Atassummiit naqissusissavarput.

Taamatut naatsumik Atassummiit tamakkiisumik tapersivugut, kaammattuutigissallugulu suliap aappasaaneerineqartigani ataatsimiititaliami susassaartumi sukumiisumik suliarineqaaqqaassasoq.

Qujanaq.

Meeqqanut ikiorsiinerit pigasuartuunngitsut timikkut aammalu tarnip pissusaat pillugu immikkoortortaqarfimmut innersuunneqarnermiit annerpaamik qaammat ataaseq ingerlasimanissaanik anguniagalimmik innersuussinissaq kisitsisilersuinissarlu siunertaralugu tarnip pissusaa pillugu aammalu meeqqat timikkut nakorsiartarfiannersunik sukkasuumik suligasuartussanik suleqatigiissitaliornissamik Naalakkersuisut pilersitsinissaat siunertaralugu Inatsisartut aalajangiiffigisassaattut siunnersuut. Suleqatigiissitap taamatutaaq aningaasatigut sulisutigullu pisariaqartitat ersarissassavaat. Suleqatigiissitap innersuussassat kisitsinerillu UPA 2023 nallertinnagu naammassisimassavaat.

(Inatsisartuni ilaasortaq Anna Wangenheim, Demokraatit)

Siullermik siunnersuuteqartumut qulaani qulequttamut takkajaamut atuarneqareersumut qujanaq, imatullu naatsumik Atassummiit oqaaseqarfigissavarput.

Aalajangiiffigisassatut siunnersuummi qulequtarineqartoq pingaartumillu tunngavilersuutaasumi ilaatigut inatsisartuni aalajangersimanigut, piffissami sivisuallaartumi utaqqisariaqartarnerup massakkornit annikinnerulernissaanik siunertaqarnermik aqqiiviginiarlugu pisariaqalersoq.

Maaniami inimi ataasialinngilagut, siornakkunni inatsisartuni akuerisimasagut Naalakkersuisuniit suliat assigiinngitsut akuerivittariaqariaqartakkagut. Taamaattumik siunnersuuteqartup Inatsisartut ukiut arfineq marluk qaangiussimalerneranik isumaqatigiissummut ilanngunnissatsinnut utaqqikatanneranik suaaruteqarnera assersuutit ilagiinnarpaat.

Siunnersuut tunngaviatigut taperserlugu, suliaq aappassaaneerneqannginnermini ataatsimiititaliamut susassaartumut ingerlateqqaarneqarnissaa Atassummiit kaammattuutigaarput.

Qujanaq.

Imm. 89

Meeqqat ADHD-eqartut, ADD-eertut, autismeqartut aammalu/imaluunniit angstertut suussusersineqarnissaat taamaasillutalu ikorsinnaanissaat qanoq pikkoriffinerulersinnaanerinit tigussaasunik innersuussuteqartussanik suleqatigiinnik immikkut ilisimasalinnik pilersinnissaannik Naalakkersuisut peqquneqarnissaat pillugu inatsisartut aalajangiiffigissassaattut siunnersuut. Suleqatigiit immikkut ilisimasallit innersuussutit 1. juni 2023 nallertinnagu saqqummiutissavai.

(Inatsisartunut ilaasortaq Nivi Olsen, Demokraatit)

Siullermik qulaani qulequtarineqartumut siunnersuuteqartoq Atassummiit qutsavigissavatsigit, imatullu Atassummiit naatsumik oqaaseqarfigissavarput.

Siunnersuuteqartup Naalakkersuisut peqquneqarnissaannik inatsisartut aalajangiiffigissassaattut suleqatigiinnik immikkut ilisimasalinnillu peqquneqarnissaanik imalik tunngavilersuutaasorlu ersarilluinnartumut pisarialimmullu, tunngaviatigut tamakkiisumik isumaqataanerput matumuuna Atassummiit oqaatigeriissavarput.

Taamaattumik takinerusumik oqaaseqarfiginagu, suliap aappassaaneerneqartigani ataatsimiititaliamut susassaartumut peqqissaarullugu suliareeqqaarneqarnissaa Atassummiit inassutigissavarput. Ataatsimiititaliarlu angusaqarluarnissaanik kissaallutigu.

Qujanaq.